

四庫全書

子部

欽定四庫全書

子部

冊府元龜卷二十一至二十四

詳校官中書臣瞿 照

員外郎臣牛穎文覆勘

總校官庶吉士臣何思鈞

校對官中書臣王鍾泰

謄錄監生臣閻學朱

欽定四庫全書

冊府元龜卷二十一

宋 王欽若等 撰

帝王部

徵應

自古受命而王者莫不有徵應焉歲起攝提肇生天皇  
書契而下益章章矣故曰黃河清而聖人生里社鳴而  
聖人出羣龍見而聖人用生既異稟則文王之在母不  
憂出既殊感則漢高以斬蛇自負用既響合則光武應

白水之讖而中興矣傳曰天降時雨山川出雲嗜欲將至有開必先易曰雲從龍風從虎聖人作而萬物覩上自日月星辰下及昆蟲草木以時荐社者何可勝道哉是知天人合契靈祇幽贊運之斯啟感而遂通乘時建事大勲以集蓋帝者之興未有不休徵先兆以表眷命之符者也

帝堯初爲唐侯嘗夢攀天而上之

帝舜耕於歷山夢眉長與鬚等

夏禹初爲司空觀於河有長人白面魚身出曰吾河精也呼禹曰文命治滻授禹河圖言治水之事乃退入于淵

周文王父季歷之十年飛龍盈於殷之牧野此蓋聖人在下位將起之符也及爲西伯作邑于豐文王之妃曰太姒夢商庭生棘太子發植梓樹於闕間化爲松栢柞棫以告文王文王幣告羣臣與發並拜吉夢季秋之甲子赤雀啞書及豐止于昌戶昌拜稽首授之其文要曰

姬昌蒼帝子亡殷者紂

武王伐紂度孟津中流白魚躍入王舟王俯取魚長三尺目下有赤文成字言紂可伐王寫以吉字魚丈消燔魚以告天有火自天止于王屋流爲赤鳥鳥啞穀焉穀者紀后稷之德火者燔魚以告天天火流下應以吉也遂東伐紂勝於牧野兵不血刃而天下歸之

漢高祖初從王媪武負貰酒時飲醉臥武負王媪見其上嘗有恆高祖每酤留飲讌數倍及見恆歲竟此兩家

常折券棄負後高祖以亭長爲縣送徒驪山徒多道亡  
自度比至皆亡之到豐西澤中亭止飲夜皆解縱所送  
徒曰公等皆去吾亦從此逝矣徒中壯士願從者十餘  
人高祖被酒夜逕澤中令一人行前行前者還報曰前  
有大蛇當徑願還高祖醉曰壯士行何畏乃前拔劍斬  
蛇蛇分爲兩道開行數里醉因臥後人來至蛇所有一  
老嫗夜哭人問嫗何哭嫗曰人殺吾子人曰嫗子何爲  
見殺嫗曰吾子白帝子也化爲蛇當道今者赤帝子斬

之故哭人乃以嫗爲不誠欲苦之嫗因忽不見後人至高祖覺告高祖高祖乃心獨喜自負諸從者日益畏之高祖隱於芒碭山澤間呂后與人俱求嘗得之高祖恠問呂后后曰季所居上嘗有雲氣故從往嘗得季高祖又喜沛中子弟或聞之多欲附者高祖旣入咸陽范增令人望其氣皆爲龍成五色此天子氣故勸項籍急擊之勿失沛公用項伯張良謀來謝得免高祖旣爲漢王二年項籍擊漢睢水上大破漢軍多殺士卒睢水爲之

不流圍漢王三匝大風從西北起折木發屋揚沙石晝

晦楚軍大亂而漢王得與數十騎遁去陳餘襲破常山

王耳敗走曰漢王與我有故而項王彊立我我欲之

楚甘公曰

善說星者  
氏也齊人

漢王之入關五星聚東井東井

者秦分也先至必王楚雖彊後必屬漢耳遂走漢

又漢書載

漢元年十月五星聚晉東井以歷推之從歲星也此高皇帝受命之符故客謂張耳曰東井秦地漢王入秦五星從歲星聚當以義取天下秦王子嬰降漢王於軻道漢王以屬吏寶器婦女亡所取并封公門還軍次于霸上以候諸侯與秦民約法三章民亡不歸心者可謂能行義矣天之所予也五年遂定天下卽帝位此明歲星

之聚東卦為  
秦地明效也

文帝初爲代王會丞相大尉共誅諸呂使行迎代王代王報太后計猶豫未定卜之兆得大橫龜曰兆筮曰卦正橫卜以荆灼龜文占曰大橫庚庚余爲天王夏啟以光庚庚橫貌其也先是五帝官天下堯則禮賢至夏啟始傳嗣能其繇也繇文也占謂光先君之業文帝亦襲父迹言似啟也繇音文救切本作籀籀書也代王曰寡人固已爲王又何王乎卜人曰所謂天王者乃天子也

昭帝武帝少子也母曰趙婕妤本以有竒異得幸謂望氣者

言有奇女子氣及召見手  
指掌上自披之卽時伸

及生帝亦奇異乃生

十四月

宣帝武帝曾孫在襁褓坐戾太子繫郡邸獄望氣者言長安獄中有天子氣帝遣使者分條中都官獄繫者輕重皆殺之內謁者令郭穰夜至郡邸獄丙吉拒閉使者不得入曾孫賴吉得以全幼時居數有光耀每買餅所從家輒大饑與售同亦以是恠初昭帝元鳳三年正月泰山萊蕪山南匈匈有數千人聲民視之有大石自立高丈五尺大四十八圍入地深八尺三石爲足石立後有

白鳥數千下集其旁昌邑有枯社木卧復生又上林苑中大柳樹斷枯卧地亦自立生有蟲食樹葉成文字曰公孫病已立時眭孟推春秋之意以爲石柳皆陰類下民之象泰山者岱宗之嶽王者易姓告代之處今大石自立僵柳復起非人力所爲此當有從匹夫爲天子者枯社木復生故廢之家復生明公孫氏當復興者也孟意亦不知所在卽說曰先師董仲舒有言雖有繼體守文之君不害聖人之受命漢家堯後有傳國之運漢帝

宜誰差天下求索賢人

誰問差擇也

問禮以帝位

禮古禪字

而退自封百里如殷周二王後以承順天命孟使友人

內官長賜上此書

內官署名百官表云內官長丞初屬少府中屬主爵後屬宗正賜者其長

之名也

時昭帝幼大將軍霍光秉政惡之下其書廷尉奏

眭孟妄設妖言惑衆大逆不道皆伏誅後五年孝宣帝

興於民間卽位徵孟子爲郎

宣帝初名病已

後漢光武皇考南頓君欽初爲濟陽令以建平元年十

二月甲子夜生光武於縣舍有赤光炤室中欽異焉使

卜者王長占之長辟左右曰此兆吉不可言是歲縣界有嘉禾生一莖九穗因名光武曰秀明年方士有夏賀良者上言哀帝云漢家歷運中衰當再受命於是改號爲泰初元年稱陳聖劉太平皇帝以厭勝之及王莽篡位忌惡劉氏以錢文有金刀故改爲貨泉或以貨泉字文爲白水真人後望氣者蘇伯阿爲王莽使至南陽遙望見舂陵郭暗曰氣佳哉鬱鬱匆匆然及始起兵還舂陵遠望舍南火光赫然屬天有頃不見道士西門君惠

李守等亦云劉秀當爲天子更始立光武爲大司馬徇  
河北以王郎新盛乃北徇薊晨夜兼行蒙犯霜雪天時  
寒面皆破裂至滹沱河無船適遇冰合得過未畢數車  
而陷又王霸傳曰光武徇薊王郎起兵光武卽南馳至下曲陽傳聞王郎兵在後從者恐及至滹沱河候吏還白河水流澌無船不可濟官屬大懼光武令王霸往視之霸恐驚衆欲且前阻水還卽詭曰冰堅可渡官屬皆喜光武笑曰候吏果妄語也遂前北至河河水亦合乃令霸護渡未畢數騎而冰解光武謂霸曰安吾衆得濟免者卿之力也霸謝曰此明公至德神靈之祐雖武王白魚之應無以加此光武謂官屬曰王霸權以濟事殆天瑞也惶惑不知所之有白衣老父在道旁指曰努力

信都郡爲長安守此去八十里光武卽馳赴之信都太  
守任光開門出迎光武

安帝自在邸第數有神光炤室又有赤蛇盤於牀第間  
獻帝母王美人妊娠畏何后服藥欲除之胎安不動又  
數夢負日而行

魏太祖之爲魏王也先是熹平五年黃龍見譙光祿大  
夫橋玄問太史令單颺此何祥也颺曰其國後當有王  
者興不及五十年亦當復見天事恒象此其應也內黃

殷登默而記之至四十五年太祖爲魏王登尚在文帝

初爲魏王延康元年三月黃龍見譙登聞之曰單颺之

言其驗茲乎

魏書曰王召見登謂之曰昔成風聞楚丘之繇而敬事季友鄧晨信少公之言而自

納光武登以篤老服膺占術記識天道豈有是乎賜登穀一百斛遣歸家

四月饒安縣言白

雉見

賜饒安田租渤海郡百戶牛酒大酺三日太常以太牢祠宗廟

八月石邑縣言鳳

凰集又郡國十三言鳳凰見二十七言白虎見是年麒麟

麟十見郡國

晉武帝初爲中撫軍魏咸熙元年六月鎮西將軍衛瓘

至於成都得璧玉印各一枚文似成信字魏人宣示百官藏于相國府賈充聞之曰吾聞譙周之言先帝諱備其訓具也後主諱禪其訓授也如言劉巴具矣當授與人也今中撫軍名炎而漢年極於炎興瑞出成都而藏之于相國府此殆天意矣是歲拜充為梓潼太守明年八月嗣相國晉王位是月長人見於襄武長三丈告縣人王始曰今當太平初張掖郡刪丹縣金山玄川溢涌寶石負圖狀象靈龜廣一丈六尺長一丈七尺一寸圍

五丈八寸立于川西有石馬七其一仙人騎之其一羈  
絆其五有形而不善成有玉匣關蓋於其前上有玉字  
玉琰二璜一麒麟在東鳳鳥在南白虎在西犧牛在北  
馬自中布列四面色皆蒼白其南有五字曰上上三天  
王又曰述大金大討曹金但取之金立中大金馬一匹  
在中大吉開壽此馬甲寅述水凡中字六金字十又有  
若八卦及列宿掌彗之象焉

搜神記曰初漢元成之世先識之士有言曰魏年有和  
當有開石於西三千餘里繫五馬文曰大討曹及魏之

初興也張掖之柳谷有開石始見於建安形成於黃初文備於太和周圍七尋中高一仞蒼質素章龍馬麟鹿鳳凰仙人之象燦然咸著此一事者魏晉大興之符也至晉太始三年張掖太守焦勝上言以留郡本國圖較今石丈丈字多少不同謹具圖上按其丈有五馬象其一有人平上幘執戟而乘之其一有若馬形而不成其字有金有合有中有大司馬有王有大吉有正又有開壽其一成行曰金當取之漢春秋曰氐池縣大柳谷口夜激波湧溢其聲如雷曉而有蒼石立水中長一丈六尺高八尺白石盡丈爲十三馬一牛一鳥八卦玉玦之象皆隆起其丈曰大討曹適水中甲寅帝惡其討也使鑿去爲計以蒼石室之宿昔而白石滿焉至晉初其丈愈明象皆煥徹如玉焉

懷帝初誕有嘉禾生於豫章之南昌先是望氣者云豫

章有天子氣其後竟以豫章王爲皇太弟

元帝以晉王卽位始秦時望氣者云五百年後金陵有天子故始皇東遊以厭之改其地曰秣陵瀆北山以絕其勢及孫權之稱號自謂當之孫盛以爲始皇逮於孫氏四百三十七載考其歷數猶爲未及帝之渡江也乃五百二十六年真人之應在於此矣初有玄石圖有牛繼馬故宣帝初忌牛氏遂爲二榦其一口以貯酒焉帝先飲者佳而以毒酒鴆其將牛金而恭王妃夏侯氏竟

通小吏牛氏而生元帝咸寧初風吹大社樹折社中有  
青氣占者以爲東莞有帝者之祥繇是徙封東莞王於  
瑯琊卽帝祖武王也及吳之亡王濬實先至建鄴而皓  
之降款遠歸璽於瑯琊天意人事又符中興之兆帝初  
鎮建業郭璞爲王導參軍導令璞筮之遇咸之井璞曰  
東北郡縣有武名者當出鐸以著受命之符西南郡縣  
有陽名者井當沸其後晉陵武進縣人於田中得銅鐸  
五枚柄口皆有龍虎形又有將雛諸雀集其前皆驅去

復還至於再三又有鵝三四頭高飛且鳴周迴東西晝夜不下如此者六七日豫章有大樟樹大三十五圍枯死積久求嘉中忽更榮茂又歷陽縣中井沸經日乃止及帝爲晋王又使璞筮遇豫之睽璞曰會稽當出鐘以告成功上有勒銘應在人家井泥中得之繇辭所謂先王以作樂崇德殷薦之上帝者也及帝卽位大興初會稽鄰縣人果於井中得一棧鐘長七寸二分口徑四寸半上有古文奇書十八字云會稽徽命餘字時人莫識

之璞曰蓋王者之作必有靈符塞天人之心與神物合契然後可以言受命矣觀五鐸啟號於晉陵棧鐘告成於會稽瑞不失類出皆有方豈不偉哉若夫鐸發其響應徵其象器以數臻事以實應天人之際不可不察初武帝伐吳琅琊武王仲率衆出塗中而王渾逼歷陽王濬已次近路孫皓欲降送天子璽綬近越二將而遠送詣仲識者咸恠之吳之未亡也吳郡臨平湖一日自開湖邊得石函中有小青石刻作皇帝字舊言臨平湖塞

天下亂開則天下太平吳人以爲美祥俄而吳滅後帝興於江左

康帝初爲吳王成帝咸和六年五月曲阿有柳樹倒地六載是月忽復起生九年五月甲戌吳雄家有死榆樹是日因風雨起生與漢上林斷柳起生同象時雖改封琅琊而猶食吳郡爲邑是帝起體饗國之象也曲阿先亦吳地象見吳皆天意也

孝武帝始四歲時哀帝興寧三年五月廬陵西昌縣修

明家有死栗樹是日忽起生及得位垂統識者竊曰西昌修明之祥帝諱實應之矣

孝武諱曜  
宇昌明

是與漢宣帝頗

同象也

後魏道武初生于參合陂明年有榆生于埋胞之坎後遂成林帝旣爲代王登國六年十二月出獵親獲鹿一角召問羣臣皆曰鹿當二角今一角是諸國將并之應也天興元年遂卽皇帝位初聖武帝諱詰汾嘗率數萬騎田於山澤歛見輜輶自天而下旣至見美婦人侍衛甚

盛帝異而問之對曰我天女也受命相偶遂同寢宿旦請還曰明年同時復會此處言終而別去如風雨及期帝至先所田處果復相見天女以所生男授帝曰此君子也善養視之子孫相承當世爲帝王語訖而去子卽始祖神元帝諱力微也故時人謠曰詰汾皇帝無婦家力微皇帝無舅家天興四年新興太守上言晉昌民賈相昔年二十二爲雁門郡吏入句注西陘見一老父謂相曰自今以後四十二年當有聖人出於北方時當

太平子孫永長吾不及見之言終而過相顧視之父老化為石人相今七十下檢石人見存至帝破慕容寶之歲四十二年

後周太祖其先普廻因狩得玉璽三紐有文曰皇帝璽普廻異之以為天授後太祖為夏州刺史嘗從數騎於野忽聞簫鼓之音以問從人莫之聞也賀拔岳為侯莫陳悅所殺太祖遂奄有其衆初岳營於河曲有軍吏獨行忽見一老翁鬚眉皓素謂之曰賀拔雖復據有此衆

然無所成當有一字文家從東北來後必大盛言訖不見此吏嘗與所親言之至是方驗

隋高祖初生有尼來自河東謂皇妣曰此兒所從來甚異不可俗間處之將高祖舍於別館躬自撫養皇妣嘗抱高祖忽見頭上角出徧體鱗起皇妣大駭墜高祖於地尼自外入見曰已驚我兒致令晚得天下至周武帝時定州城西門久閉不開齊文宣帝時或謂開之以便行路帝不許曰當有聖人來啟之及隋高祖至而開焉

莫不驚異

唐高祖初仕隋爲譙隴刺史善相者史世良言於高祖曰公骨法非常必爲人主至於命也非所敢知久之世良復遇高祖乃大驚曰骨法如舊年壽之相頗異昔時勿忘鄙言願深自愛高祖心益自負及爲殿內少監時尚食奉御郭弘道善相高祖善之弘道因言曰公天中伏犀下接於睂此非人臣之相宜深自愛高祖取弘道銀盆置之於地引弓射之謂弘道曰向言有驗當一發中

之既發應弦而中弘道曰願公事驗之日賜賞金盆高祖大悅後爲太原留守鎮并州時武士穀爲司鎧叅軍事詰朝嘗於街內獨行聞空中有人言曰唐公是天子士穀尋聲不見有人乃以此白高祖并進兵書高祖悅之曰幸勿多言兵書禁物尚能將來深識好心當同富貴耳其夜士穀夢高祖乘馬上天旦以狀聞高祖大悅於是出入卧内委以心腹大業十三年起義兵於太原五月甲子慶雲見甲戌有白鳥飛入高祖之懷七月丙

辰師次霍邑隋武牙郎將宋先生陳兵拒險義師不得進屯軍於賈胡堡會霖雨積旬餽運不給高祖患之忽有白衣老子詣軍門請見曰予霍山神遣語大唐皇帝若向霍邑當東南傍山取路八月雨止我當助爾破之高祖初哂之遣人東南視地果有微道高祖笑曰此神不欺趙襄子豈當負吾耶時有訛言云突厥將襲太原又軍糧且盡高祖命旋師太宗切諫乃止八月己卯雨果霽高祖大悅以太牢祭霍山庚寅次古堆去絳郡二

十餘里有紫雲如華蓋樓闕之形正臨高祖之上癸巳  
次龍門縣河水變清白狐見十一月丙辰入京師尊代  
王爲天子改元義寧元年高祖爲唐王義寧二年二月  
辛卯安邑白鹿見甲午河池言慶雲見三月丙辰高祖  
汎舟於後池有魚二躍入舟乙丑趙郡公孝恭獻神龜  
背上冇文曰萬國付某代代樂武德六年七月車騎將  
軍劉山濤上書高祖龍潛時數往來雒交之莊舍踐二  
石靴迹見於石中至今猶在高祖令鑿之深寸餘其迹

愈明乃止

初隋大業中有謠云桃李子洪水繞揚山煬帝疑李氏有受命之符故誅李金及李密據

雒口倉欲其應識隋文時自長安故城東南移於唐興村置新都令西內承天門正當唐興村門今有大槐樹柯葉森鬱卽村門樹也有司以行列不正將去之帝曰高頤嘗坐其下不可去也

太宗文皇帝以隋開皇十八年歲次戊午生於武功之別館初太宗在孕而語聲達於外后心異之將誕育后不之覺而太宗已生時有慶雲見瀰漫數里上屬於天二龍戲於門外水中經三日乃冲天而去見者驚焉大業十三年望氣者云龍門有天子氣連太原甚盛故煬

帝置離宮數遊汾陽宮以厭之至是太宗稱述此事以  
白高祖既舉義師旦日太宗所居處有紫雲當其上俄  
變爲五色狀如飛龍武德八年拜中書令嘗夜於嘉猷  
門側見一神人長丈素衣冠呼太宗進而言曰我當  
令汝作天子太宗再拜忽因不見所居弘義宮中有一  
大池嘗作佳氣鬱然高數百尺太宗心獨異之至九年  
其氣轉盛上屬於天六月癸未克定內難立爲皇太子  
萬機巨細皆令取决初太宗爲秦王高祖制詩云聖德

合天地五宿連珠見和風拂世民上下同歡宴帝於宮  
西造宅初成高祖送玉璽以至帝所縉紳先生相謂曰  
詩及玉璽蓋奉國之祥瑞者歟又有方士喬伏仁善言  
符命見建成元吉俱有爭心因謂所親曰秦王應天上  
錄當爲元君此二人乃驅除耳果如其言鄖隱海陵之  
未發也太史奏云太白入南斗秦王得天下其鋒不可  
當自非皇天眷顧何以臻此

高宗初爲晉王貞觀十七年太子承乾得罪廢爲庶人

次當立者濮王太宗以晉王仁孝又以太原瑞石文云  
李治萬吉乃與長孫無忌房玄齡李勣褚遂良等定計  
立為皇太子

睿宗初生於含涼殿則天乃於殿內造佛事有玉象焉  
及長遊觀其側玉象忽言爾後當為天子

玄宗初為臨淄郡王景龍二年出為潞州別駕境有黃  
龍白日上升天又視事之際吏咸見赤龍據案嘗出畋  
有紫雲在其上從者望而奇之四年來朝京師將行使

術士韓禮筮有一蓍子然獨立禮驚曰策立其瑞非常之事也貴不可言旣行所過之處大人迹見州人皆異之先是帝所居宅外有池水浸溢頃餘望氣者以爲龍氣是年四月中宗幸其第因遊其池結綵爲樓船令巨象踏之及平內難日寅時潞州聞空中語曰臨淄王誅韋庶人相王得天下吏驚走遽白于刺史以掾吏狂妄留繫旬日會制到乃捨之帝自至潞州日抱戴月重輪嘉禾合穗李樹連理等凡十有九瑞

開元二年六月左拾遺蔡孚獻龍池集王公卿士以下  
凡百二十篇請付太常寺其辭合音律者爲龍池樂章  
以歌聖德從之初帝在藩與宋王等居于興慶里時人  
謂爲五王子宅及景龍末宅外池水湧出汎灑清瑩流  
之不竭中有龜龍遊焉故羣臣歌之八年鄭州人元承  
徵上封事曰謹按魏典及北齊至後魏太平真君年中  
內學者奏言上黨有天子氣在壺關大王山于時太武  
南巡親幸上黨掘山封石將以厭之亦猶秦始皇東遊

望氣者云五百年後金陵有天子氣始皇乃改金陵爲  
秣陵塹北山以絕其勢孫權僭號吳人以爲當之孫盛  
晉陽秋云從始皇東遊之歲至孫權僭號之時中間四  
百三十七年數權未當應及晉元帝南渡始有五百二  
十六年以彼金行奄居四海金陵之瑞其在茲乎又按  
太武之後百有餘年高歡以內學之言復欲妄干符命  
因勒兵馬來在晉陽舍於壺關六旬而去更有上黨百  
姓從在晉陽因名上黨之坊實曰晉陽之地歛又居此

僞以應之論其僭應則高歡不異於孫權語以虛攘則  
太武有同於贏政暗于時運豈不惜哉臣等恭尋符命  
壺闢天子之氣正是陛下當焉玄穹上聟符命下鍾故  
使歷試潞州所以用當其應此天意也豈人事乎然而  
一幸潞州三移灰琯壺闢之地歲時爲蒐狩之場大王  
之山朝夕卽豫遊之所始能龍潛上黨尋乃鳳舉咸寧  
內學之言果合符契又按內學所奏符應年月太平真  
君太平則叶今辰真君則更明陛下自唐至魏二百餘

年觸類而推無不驗應伏願陛下上承天意下諭人心  
昭告寰瀛編列國史從之

肅宗初爲皇太子天寶十三載觀安祿山有悖逆之狀  
恐危宗廟遂精誠祈夢其夜夢故內侍普寂等二人昇  
一紫案覆以黃帕自天而下直至帝前素版丹書文字  
甚多旣寤所記者維四句曰厥不云乎其惟其時上天  
所保福祿不虧十五載六月玄宗幸蜀帝幸靈武次永  
壽縣雲氣見西北長數丈成樓閣之狀識者以爲天子

氣自是紫雲擁帝所乘馬聚散不時至平涼都路傍遇  
一伏兔命左右索弓箭因謂左右曰吾若破賊射則中  
之不然則否一發而斃左右咸稱萬歲帝初發平原有  
雲彩見空白鶴前引出軍之後有黃龍自帝所憩屋騰  
空而去後於彭原郡受冊太上皇下誥曰間者日抱帶  
赤雀白狼之瑞接武薦臻此皆皇帝聖敬之符孝友之  
感也

憲宗自廣陵郡王冊爲皇太子時順宗卽位已久而臣

下未有親奏對者內外咸言王伾王叔文專行斷決日有異說又屬頻陰雨皆以爲羣小用事之應及將行冊禮之夕雨乃止至行事之時天景晴朗有慶雲見識者以爲天意有所歸

宣宗初封光王十餘歲時遇重疾沈懼忽有光曜燭身蹶然而興正身拱揖如對臣僚乳媼以疾聞穆宗徃視之撫其手曰此吾家英物非心憊也賜以玉如意御馬金帶嘗夢乘龍升天言之於鄭太后乃曰此不宜人知

幸勿復言

懿宗初封鄆王嘗經重疾郭淑妃侍醫藥見黃龍出入  
卧內既間妃以異告帝曰慎勿復言又嘗大雪數尺而  
帝寢室之上獨無人皆異之大中末年京城小兒搘布  
蘸水向日張之謂之捩暈又宣宗曾製奏邊陲曲撰詞  
云海岳宴咸通至是帝以鄆王卽位改元咸通卒皆驗  
昭宗卽位前一日於宅所居之邸東垣有紫氣二條若  
成文字俄於氣生之處發其垣獲金龍子一枚諸王及

左右咸共觀見及聽政頒示百官

後唐武皇初爲太原節度使以昭宗景福二年十二月  
狩於近郊獲白兔有角長三寸

莊宗初嗣晉王時長柳巷田家有桃樹伐已經年舊坎  
仍在其仆木一朝屹然而起行數十步復於舊坎其家  
驚駭蒼黃散走議者以漢昭帝時上林仆木起立生枝  
蟲蠹成文而宣帝興今木理成文仆而重起亦李氏中  
興之符也又天祐十七年幽州人於田中得金印文曰

關中龜印李紹宏使人送於行臺議者曰關中列聖所  
都龜者卜年之物符璽傳授之器漣落在田乃今復見  
蓋王者受命之符也十八年正月魏州開元寺僧傳真  
獲傳國璽一送於行臺傳真之師於廣明中遇京師喪  
亂得之緘秘已四十年篆文古體人不識之唯以珍物  
秘藏非以爲國璽也興建初法物司收市寶玉傳真將  
鬻之玉人識而嘆曰國寶之一也何至於斯傳真且喜  
送於行臺帝出之以示諸將驗其文卽受命八字也光

彩瑩曜希世罕有羣僚諸將奉觴稱賀帝曰天祚有德  
錫之神器顧于眇末何敢當之止於緘藏俟其真人耳  
二十年正月丙子朔五臺山僧獻銅鼎一枚每容二斗  
言於山中石崖隙裂得之形器古異識者以爲中興之  
瑞按西漢哀平之間扶風王延年獲銅鼎一枚赤色有  
光後光武誅新莽中興漢室鼎者帝王重器以異爲瑞  
不必貢金九牧質重萬鈞以爲異也

明宗初在太宗左右嘗巡邊宿於鴈門逆旅逆旅媼方

姬帝至媯慢不時具食腹中兒謂母曰大家至速宜具食聲聞於外媯異之遽起親奉饗敬事尤謹帝曰媯前倨後恭詰之曰公貴不可言也問其故具道姬子腹語事帝曰慢媯遜言懼干辱耳同光末自鄴廻趨白臯渡將濟以渡船甚少帝方憂之忽有木筏數隻沿流而至卽用以濟師故無留滯焉

末帝初在太原嘗與晉高祖因擊毬同入趙襄子之廟見其塑像屹然起立帝私心自負及爲護國軍節度使

一日夢明宗召至寢門與宋王各剃頭而退及寤以問賓吏皆無對者時雨池擢鹽推官李專美在坐屏人謂帝曰將來嗣主必明公也帝心喜之又帝在歧陽日有前爲判獄吏何叟者失其名年踰七十暴卒於家見一人

謂何曰陰府召君何隨之至一公宇甚宏敞有吏憑几戒何曰召汝無他事爲吾言於潞王來年三月當爲天子善自愛也及蘇密告帝親要慮其妄誕不敢言月餘復卒陰官見而叱曰汝安得違吾旨不達其事何具陳

爲左右所阻陰官曰且放汝還可速言之何退見廊廡  
下有簿書狼籍以問主者曰此朝代將改升降人爵之  
籍也及再蘇謁劉延朗密道其事帝屏人召何入問謂  
曰爾雖有憑吾無以信何曰某衰耄若此唯有一子請  
大王質之如無驗可殺之又張漾岐州之瞽者自言知  
術數不龜不蓍言是太白山神其神祠元魏時崔浩廟  
時事否泰人之休咎漾告於神卽傳吉凶之言房暠昵  
於事神酷信之帝在歧陽暠引漾謁見聞帝語聲駭然

曰非人臣也令嵩詢其事卽傳神語曰三珠併一珠驢  
馬没人驅歲月甲庚午中興戊巳土嵩請曰神言予不  
知也長興四年五月府廨諸門無故自動人頗駭異遣  
嵩問濛濛見嵩來未交言先問嵩衙署小異勿恠不出  
三日有恩命其夜報至封潞王及帝被疑除鎮甚恐再  
三質濛初濛曰且爲備王保無患及王恩同兵將至又  
召濛謂之曰爾言無患今天下兵來萃我城下內無兵  
食外無援助得無患乎濛曰王有天下不能獨立朝廷

兵來迎王也王若疑臣臣惟一子未及冠請王致之麾  
下以質臣心及帝入雒受太后冊其日御明堂宰相讀冊  
文維應順元年歲次甲午四月庚午朔帝廵視房嵩曰  
張濛神言甲庚事不亦異乎帝令嵩共術士解三珠一  
珠事言三珠三帝也驢馬無人驅失主也又帝在岐時  
有人已死復生言帝必登大位二十三年好事者附其  
意言帝小字二十三又云潞字一足入雒時石瓊人胡  
呆通會天文帝亦召問之曰王至貴不可言若有舉動

宜以乙未年及舉兵又問曰今歲歷法名陰部首王者不宜建功立事王且挾今主俟來歲入朝則福祚永遠帝姓王氏真定房山人也邑南三里里墅名曰王子則所生之地地稱王子亦有符焉旣卽位以族兄爲令訪名未獲守先舊廬植松櫟以爲墳園其側有古佛刹刹有石像忽搖動不已人駭而告令令趣之復爾時甚異焉

晉高祖初爲河東節度後唐末帝出師重圍晉陽帝遣心腹何福單騎求援北蕃蕃王自將諸部赴之不以繒

帛不以珠金若響應聲謂福曰吾已兆於夢皆上帝命  
我非我意也時援兵未至唐將張敬達引軍逼城設柵  
柵將成忽有大風雨暴起柵無以立後築長連城城欲  
就又爲水潦所壞城竟不能合晉陽有北宮宮城之上  
有祠曰毗沙門天王帝曾焚修默而禱之經數日城西  
北閨正受敵處軍候報稱夜來有一人長丈餘介金執  
父行於城久方不見帝心異之又牙城有僧坊曰崇福  
坊之廡下西北隅有泥神神之首忽一日有煙生其騰

郁如曲突之狀坊僧奔赴以爲人火所延及俯而視之無所有焉事尋達帝帝召僧之謄高者問焉僧曰貧道見莊宗將得天下曾有此煙觀其噴湧甚於當時可知矣自此日傍多有五色雲氣如蓮芰之狀帝召占者視之謂曰此驗應誰占者曰見處爲瑞更應何人又帝每詰旦使人慰撫守陴者率以爲常忽一夕已暝城上有號令之聲聲不絕者三帝使人問之將吏云從上傳來人皆知其神助時城中忽有數處井泉暴溢不止及蕃

軍大至合埶破唐師之衆如拉朽焉斯天運使然非人力也先是朱梁改元之始卽天祐之四年也潞州行營使李思安奏壺關縣庶穰鄉鄉人伐樹樹倒自分兩片內有六字如左書云天十四載石進梁主藏於武庫時遣詞臣李琪答詔嘉其瑞焉然莫詳其義至帝卽位人以爲雖有國姓計其甲子則二十年有奇矣議者曰天字取四字中兩畫加之於旁則丙字也四字去中之兩畫加十字則申字也帝卽位之年乃丙申也又易云晉

者進也國號大晉皆符契焉又卽位之前一年年在乙未鄴西有柵曰李固清淇合流在其側柵有橋橋下大鼠與蛇鬪鬪及日之中蛇不勝而死行人觀者數百識者志之後唐末帝果滅於申

少帝初爲金吾上將軍天福三年從高祖幸大名其年天旱高祖遣祈雨白龍潭焚請未罷有白龍見於潭心是日澍雨尺餘人甚異之

漢高祖初仕爲河東兵馬使嘗因事至代北遮虜軍路

側有唐衛公李靖祠遇戍卒乘酒以索戲繫其神之頸  
卒尋致殞時成長邑老玄陳祈禱以解之而了無應驗  
帝乃爲祝曰公本朝名將精爽在天雖庸輩亵瀆誠當  
其責而人旣有請良可恕焉因焚香致拜卒者俄蘇傳  
其神語曰此非大貴人救不可免也聞者神其事後爲  
河東節度使天福十一年天下水太原葭蘆茂盛叢上  
一葉如旗狀皆南指焉明年遂卽帝位

隱帝始高祖鎮太原周太祖握蕃漢兵要嘗侍帳中參

決戎政時令少帝監符璽頗相戲狎暨從征鄴城旦夕同侍一日詰旦語太祖曰我夜來夢爾爲驢負我昇天旣捨爾乘俄變爲龍捨我南去何祥也笑而言曰公爲驢作少意智勿空見玩撫掌而罷爲左衛大將軍高祖欲改年號中書進擬乾和二字高祖改爲乾祐與帝名相符乾祐  
帝名帝微有風痰每連唾不止目多閃掣卽位之始遽無恙

周太祖微時嘗晝寢有如小虺五色出入顧鼻之間柴

后遽見愕然始奇特之傾資無惜后恐人騰口貽患每寢戒左右俾於屏蔽之所在太原時有神尼同姓見太祖謂李瓊曰我宗天上大仙當為世界主瓊詰其故曰頂上有肉角也

後唐清泰末時所居官舍之鄰吳氏有青衣佳娘者為山魈所魅鬼能人言而投瓦石隣伍恐悚無敢過吳氏之舍而性剛者強詣必瓦石交下太祖聞而過之言笑侮戲移時寂然如是者再太祖去鬼言如故或謂鬼曰

爾旣神聖向者客來又何寂然鬼曰向來者大人也繇是軍中大異之及爲樞密使北征率師如澶淵旭旦日邊有紫氣來當太祖馬首之上高不及百尺從官視而異之至鄆都一夕在山亭院齋忽有黃氣起於前繚繞而上遽際于天太祖於黃氣中仰見星文紫微文昌燦然在目駭曰予在室中而見天象不其異乎密告知星者乃拜賀曰坐見天衢物不能隔至貴之祥也異日又於衙署中紫氣起於幡竿龍頭之上凡二日觀者異之

及討李守貞於河中帝嘗於東砦大陳師旅鉦鼓錚鞞  
旗幟光耀守貞登陴下瞰氣色不懌獨言曰是何妖變  
後城中人言見太祖軍上有紫氣如樓閣華蓋之狀故  
也

冊府元龜卷二十一

欽定四庫全書

冊府元龜卷二十二

宋 王欽若等 撰

帝王部

符瑞

傳曰麟鳳五靈王者之嘉瑞也夫德之休明天降茂祉則必百神幽贊庶物效靈故有非人力之所能致而自至焉者先民有言曰人主和德於上百姓和合於下則天下之和應矣故嘉禾興朱草生記曰天不愛其道地

不愛其實蓋珍符之應以應有德故王者重之是以書  
載歸禾詩咏鳴鳳芝房寶鼎升於樂府神雀甘露標爲  
年紀皆所以發揚景覩光昭丕烈者也然而洪覆在上  
其道玄遠坤厚載物其德沉潛人靈歆乎至和昆蟲蒙  
乎利澤非布於僊兆震乎珍物又安能發輝眷祐而覺  
悟黎蒸者哉

太昊伏羲氏受龍圖畫八卦有景龍之瑞

炎帝神農氏致大火之瑞嘉禾生醴泉出

黃帝軒轅氏有土德之瑞故號黃帝天下既定聖德光  
被羣瑞畢臻有屈軼之草生於庭佞人入朝則草指之  
是以佞人不敢進有景雲之瑞有赤方氣與青方氣相  
連赤方中有兩星青方中一星凡三星皆黃色以天晴  
明時見於攝提名曰景星一云景星見形如半月可以夜作黃帝黃服  
齊于中宮坐于玄扈雒水之上有鳳凰集於東園或巢  
於阿閣或鳴於庭其雄自歌其雌自舞麒麟在園神鳥  
來儀有大蠻如羊大螭如虹黃帝以土氣勝遂以土德

王五十年七月庚申天霧三日三夜晝昏黃帝問天老  
力牧容成曰於公何如天老曰臣聞之國安其主好文  
則鳳凰居之國亂其主好武則鳳凰去之今鳳凰翔於  
東郊而樂之其鳴音中夷則與天相副以是觀之天有  
嚴教以賜帝帝勿犯也乃召史卜之龜燋史曰臣不能  
占也其問之聖人帝曰已問天老力牧容成矣史北面  
再拜曰龜不違聖智故燋霧除游于雒水之上見大魚  
殺五牲以醮之天乃甚雨七日十夜魚流於海得圖書

焉龍圖出河龜書出雒赤文篆字以授軒轅軒轅接萬  
神於明庭今寒門谷口是也又獲寶鼎帝南巡狩至於  
東濱澤獸出能言達萬物之情

少昊金天氏登帝位有鳳凰之瑞

帝嚳高辛氏代高陽氏王天下使鼓人拊鼙擊鐘鳳凰  
鼓翼而舞

帝堯在位七十年景星出翼鳳凰在庭朱草生嘉禾秀  
甘露潤醴泉出日月如合璧五星如連珠厨中自生肉

其薄如簾搖動則風生食物寒而不臭名曰簾脯又有  
草夾階而生月朝始生一莢月半而生十五莢十六日  
已後日落一莢及晦而盡月小則一莢焦而不落名曰  
蓂莢一曰歷莢

帝舜卽位蓂莢生於階鳳凰巢於庭擊石拊石百獸率  
舞景星出房地出乘黃之馬西王母獻白環玉玦舜命  
禹平水土四海之內咸戴帝舜之功於是禹乃興九韶  
之樂致異物鳳凰來翔天下明德自虞帝始

夏禹卽天子之位雖出龜書六十五字是爲洪範此謂  
雖出書者也禹南巡狩濟江中流有二黃龍負舟舟人  
皆懼禹笑曰吾受命於天屈力以養人生寄也死命也  
奚懼龍哉龍於是曳尾而逃禹卑宮室盡力溝洫百谷  
用成龍女降

湯有神章白狼啣鈎而入商朝金德將盛銀山自溢  
周武王卽位天下歸之周德旣隆草木茂盛蒿堪爲室  
因居蒿宮

成王時周公旦攝政七年制禮作樂祥鳥鳳凰見蓂莢生乃與成王觀於河雒沈璧禮畢王退俟至于日昧榮光並出黃河清慶雲至青龍臨壇啣玄甲之圖坐之而去禮于雒亦如之玄龜青龍蒼兕至于壇背甲刻書赤文成字周公援筆以世文寫之書成文消龜墮甲而去其言自周訖于秦漢盛衰之符麒麟遊苑鳳凰翔庭成王援琴而歌曰鳳凰翔兮於紫庭余何德兮以感靈賴先王兮恩澤深于胥樂兮民以寧周公東征諸侯咸服

宗周天降祉福唐叔得禾異畝同穎

一作穗穎卽穗也

獻之成

王成王命唐叔以餽周公於東土作歸禾周公旣受命

禾旅天子之命作嘉禾

後魏書靈徵志曰成王時治政太平黑狐見

穆王征西戎得四白狼白鹿

漢文帝十五年春黃龍見於成紀又日中有王字

景帝時會稽人朱仲獻三寸四寸珠

明月珠王者不殺鱗介之物則出

武帝元狩元年十月郊雍獲一角獸若麕然

形似麋牛麕鹿屬也

尾一有司曰陛下肅祗郊祀上帝報享錫一角獸蓋麟角

云於是以薦五畤時加一牛以燎賜諸侯白金以風符應合於天也

元鼎元年汾陰巫錦

錦巫

爲民祠魏雕后土營旁

魏故國

也汾陰本魏地之境故云

魏雕也營謂祠之兆域也見地如鉤狀培視得鼎

培謂手把

土鼎大異於衆鼎文縷無欵識

欵刻也

記也恠之言吏吏告

河東太守勝勝以聞天子使驗問巫得鼎無姦詐廼以

禮祠迎鼎至甘泉從上行薦之

以鼎從行甘泉將薦之天

至中山宴

溫有黃雲焉

三輔謂日晴霽爲宴宴而溫乃有黃雲故爲異也中讀曰仲卽今雲陽之中山也下

雲合茲中  
山亦同也

有鹿過帝自射之因之以祭云至長安公卿

大夫皆議尊寶鼎天子曰間者河溢歲數不登故巡祭

后土祈爲百姓育穀今年豐楙未報鼎曷爲出哉

楙美也

也稼

禡美也未報者獲年豐而未賽也一曰雖祈穀而未獲年豐之報也張敞引此詔文云穀嗛失報嗛者少也

有司皆言聞昔泰帝興神鼎一

泰帝者卽太昊伏羲氏也

一者一統

天地萬物所繫象也黃帝作寶鼎三象天地人禹收九

牧之金

九牧九州之牧也

鑄九鼎象九州皆嘗觴享上帝鬼神

以享祀上帝也觴享者一也觴享鬻而祀也韓詩采蘋曰予以觴之惟鑄及金足

中

其空足曰鬲

空不實者名之曰鬲也

以象三德

三德一曰正直二曰剛克

饗承

天祐

祐福也

夏德衰鼎遷于殷殷德衰鼎遷于周周德衰

鼎遷於秦秦德衰宋之社亡鼎迺淪胥而不見周頌曰自堂徂基自羊徂牛鼐鼎及鼒不吳不教胡考之休

周絲

衣之詩基門塾之基鼎絕大者謂之鼐圓弇上謂之鼒吳雖譁也考壽也休美也言報祭祀者或升堂室或升門塾視牛羊之牲及舉大小之鼎告其致絜神降之福故獲壽考之美曰何壽之美者嘆之言也今鼎

至甘泉以光潤龍變承休無疆合茲中山有黃白雲降

言鼎至甘泉之後光潤變見若龍之神能幽明能小大乘此休福無窮竟也有黃白雲降與初至中山黃雲之

瑞相

蓋若獸之爲符言甘泉之雲又若

形以爲符瑞也

路弓乘矢集獲

壇下

路大也四矢曰乘又於壇下獲弓矢之應

報祀大享惟受命而帝者心

知其意而合德焉

高祖受命知之宜見鼎於其廟也合德謂與天合德

鼎宜視宗

禰廟臧於帝庭以合明應

視讀曰示宗謂先帝有德可尊者也禰父廟也帝庭甘泉

天子制曰可時又有芝草生甘泉殿房中天子爲塞河

之庭

為塞河及造通天臺而有神光之應欲赦天下也

迺下詔

甘泉房中生芝九莖赦天下母令復作

元封二年六月詔曰甘泉宮內中產芝九莖連葉上帝

博臨不異下房

言天廣臨不下房爲幽側而隔異之賜以此芝

賜朕弘休其

赦天下賜雲陽都百戶牛酒作芝房之歌

四年三月祠后土詔曰朕躬祭后土地祇見光集于靈

壇一夜三燭

謂燭也

幸中都宮殿上見光其赦汾陰夏陽

中都死罪以下

六年三月詔曰朕禮首山昆田出珍物化或爲黃金祭

后土神光三燭其赦汾陰殊死以下

太初三年二月行幸東海獲赤鴈

後元元年二月詔曰朕郊見上帝廵守北邊見羣鶴留  
止以不羅罔靡所獲獻時春也非用罔羅時故無所獲也薦于泰畤光  
景並見其赦天下

昭帝始元元年二月黃鵠下建章宮太液池中黃鵠大鳥舉千  
里者公卿上壽

三年十月鳳凰集東海遣使者祠其處三年中鳳凰北下東海海西樂

鄉

宣帝本始元年五月鳳凰集膠東千乘

二年六月尊孝武廟爲世宗告祠世宗廟日有白鶴集後庭以立世宗廟告祠孝昭寢有雁五色集殿前西河築世宗廟神光興於殿旁有鳥如白鶴前赤後青神光又興於房中如燭狀廣川國世宗廟殿上有鐘音房戶大開夜有光殿上盡明

四年五月鳳凰集北海安丘淳于

二縣皆屬北海

地節二年四月鳳凰集魯郡羣鳥從之

元康元年三月以鳳凰集泰山陳留甘露降未央宮赦

天下徒

四年三月神爵五彩以萬數集長樂未央北宮高寢甘泉泰畤殿中及上林苑

神爵元年三月幸河東祠后土有神爵集詔曰迺元康四年嘉穀玄稷降于郡國玄稷黑粟也神爵仍集金芝九莖產于函德殿銅池中函德殿名也銅池承雷也以銅為之九真獻竒獸駒形鱗色牛角仁而愛人南郡獲白虎威鳳為寶朕之不明震于珍物飭躬齋精祈為百姓東濟天河天氣清淨神魚舞河幸

萬歲宮神爵翔集

汾陰有萬歲宮

其以五年爲神爵元年

二年正月乙丑鳳凰神爵甘露降集京師羣鳥從以萬

數

四年二月詔曰迺者鳳凰甘露降集京師嘉瑞並見修  
興泰一五帝后土之祠祈爲百姓蒙祉福鸞鳳萬舉飛  
覽翶翔集止於旁齋戒之暮神光顯著薦鬯之夕神光  
交錯或見于天或登于地或從四方來集于壇上帝嘉  
嚮海內承福其赦天下十月鳳凰十一集杜陵十二月

鳳凰集上林

五鳳三年三月行幸河東祠后土詔曰朕飭躬齋戒郊上帝祠后土神光並見或興于谷燭耀齊宮十有餘刻甘露降神爵集鸞鳳又集長樂宮東闕中樹上門外闕  
樹行馬  
之裏也飛下止地文章五色留十餘刻吏民並觀其赦殊死以下

甘露元年四月黃龍見新豐

二年正月詔曰乃者鳳凰甘露降集黃龍登興醴泉滂

流枯槁榮茂神光並見咸受禎祥其赦天下

三年二月鳳凰集新蔡羣鳥四面行列皆向鳳凰立以

萬數

黃龍元年二月黃龍見廣漢郡

成帝鴻嘉元年冬黃龍見真定

永始二年二月龍見於東萊

四年正月行幸甘泉郊泰畤神光降集紫殿

元延四年三月甘露降京師

平帝元始元年正月越裳重譯獻白雉一黑雉二

後漢光武建武二年野谷旅生麻菽尤盛野蠶成蠶於

山阜人收其利焉

先是王莽末天下旱蝗  
黄金一斤易米一斛

十二年夏甘露降南行唐

縣名屬常山郡

六月黃龍見東阿

今濟

州縣

十三年九月南越獻白兔白雉

十七年十月有五鳳凰見於潁川之郊

縣郊今鄭城縣也東觀記曰

鳳高八尺五彩羣鳥並從行  
列蓋地數頃停一十七日

中元元年五月京師醴泉湧出飲之者痼疾皆愈惟眇

塞者不瘳又有赤草生於水崖

赤草朱草也朱草日生一葉至十五日以後日落一葉周而復始

郡國頻上甘露羣臣奏言地祇靈應而朱草

萌生孝宣帝每有嘉瑞輒以改元神爵五鳳甘露黃龍

列爲年紀蓋以感致神祇表彰德信是以化致昇平稱

爲中興今天下清寧靈物仍降陛下情存損挹推而不

居豈可使祥符顯慶沒而無聞宜令太史撰集以傳來

世帝不納嘗自謙無德每郡國所上輒抑而不宣故史

官罕得記焉

明帝永平六年二月王雄山出寶鼎

雄或作雄

廬江太守獻

之四月甲子詔曰昔禹收九牧之金鑄鼎以象物使人

知神姦不逢惡氣

夏禹之時令遠方圖畫山川奇異之物使九州之牧貢金鑄鼎以象之令

人知鬼神百物之形狀而備之故人入山林川澤遭德  
魑魅魍魎莫能逢之惡氣謂魍魎之類事見左傳遭德

則興遷於商周周德既衰鼎乃淪亡

史記曰周鼎亡入泗水中秦始皇遇

彭城發出周鼎於泗水使千人沒水求之不得祥瑞之降以應有德方今政化

多僻何以致茲易曰鼎象三公

易曰鼎折足

覆公餗豈公卿奉職

得其理邪太常其以杓祭之日  
陳鼎於廟以備器用

禮記曰夏祭周以杓薄也夏物未成祭尚薄

十一年漢湖出黃金廬江太守以獻

漢湖湖名今在廬州合肥縣東南

時麒麟白雉醴泉嘉禾所在出焉

十七年正月甘露降於甘陵是歲甘露仍降樹枝內附芝草生殿前神雀五色翔集京師

章帝建初四年甘露降泉陵洮陽二縣

二縣屬零陵郡

五年零陵獻芝草有八黃龍見於泉陵

見零陵泉陵湘水中相與戲其

二大如馬有角六  
枚大如駒無角

七年十月幸槐里岐山得銅器形似酒樽獻之又獲白鹿於臨平觀

元和二年二月丙辰東巡狩己未鳳凰集肥城

縣今屬太山郡

辛未幸太山柴告岱宗有黃鵠三十從西南來經祠壇上東北過於宮屋翹翔升降五月詔曰乃者鳳凰黃龍鸞鳥比集七郡或一郡再見及白烏神雀甘露屢臻祖宗舊事或班恩施其賜天下吏爵人三級九月詔曰鳳

鳳黃龍所見亭部無出二年租賦

鳳凰見肥城句窳亭  
槐樹上古今注曰黃

龍見雒陽  
元延亭部

三年正月車駕北巡以太牢祠北嶽山見黃白氣有神魚躍出十數

章和元年七月詔曰乃者鳳凰仍集麒麟並臻甘露宵降嘉穀滋生芝草之類歲月不絕今改元和四年爲章和元年自元和二年以來至章和元年凡三年麒麟五十一鳳凰百三十九黃龍四十四青龍白龍神鳥神馬

白虎二十九白燕白兔赤鳥三足鳥白雀九尾狐木連  
理嘉禾華平朱草芝英白雉並見郡國帝在位十三年  
郡國所上符瑞合於圖書者數百千所

和帝時前後符瑞八十一所自稱德薄皆抑而不宣

安帝元初三年正月東平陸兗州縣名上言木連理三月東

平陸有瓜異處共生八瓜同蒂

延光元年八月九真言黃龍見無功無功縣屬九真郡

二年六月九真言嘉禾生

百五十六本七百六十八穗

三年二月濟南上言鳳凰集臺縣丞霍收舍樹

臺縣屬濟南郡

故城在濟州平陵縣北

四月沛國言甘露降豐縣六月扶風言白

鹿見雍七月馮翊言白鹿見甘露降頴陽衙頴川上言

木連理白鹿麒麟見陽翟八月潁川上言麒麟一白虎

二見陽翟九月濟南上言黃龍見濟南歷城十月新豐

上言鳳集西界亭十二月瑯琊言黃龍見瑯琊諸縣

諸縣

名

四年正月東郡言黃龍二麒麟一見濮陽

桓帝建和元年二月黃龍見沛國譙五月芝草生中黃

藏府

中黃藏府中藏幣帛金銀諸貨物也

二年四月嘉禾生大司農帑藏七月河東言木連理又有嘉瓜兩體共蒂

元嘉元年四月白烏見梁國十一月鳳凰見濟陰

二年八月濟陰言黃龍見句陽金城言黃龍見允街

永興元年二月張掖言白鹿見

二年四月光祿府吏舍夜壁下有青氣得玉鈎玦各一

鉤長七寸三分玦周五寸四分身中皆雕鏤

永壽元年四月白鳥見齊國

延熹三年四月上郡言甘露降

九年四月濟陰東郡濟北平原河水清

永康元年八月魏郡言嘉禾生甘露降巴郡言黃龍見

十一月西河言白兔見

一云  
白雉

靈帝熹平五年沛國言黃龍見譙

光和四年二月郡國獻芝英草七月河南言鳳凰見新

城羣鳥隨之

魏文帝黃初元年十一月受漢禪柴於繁陽有黃鳥啣丹書集於尚書臺於是改元爲黃初是月九尾狐見甄城又見譙郡國十九言白鹿及白麋見郡國三十七言甘露降郡國三言嘉禾生郡國十九言白雀見郡國十九言白鳩見郡國二言木連理朱草生文昌殿側郡國二言醴泉出神龜出於靈池鑊中生赤魚四月冬甘露降芳林園

明帝太和元年四月雒邑初營文昭甄后廟握地得玉璽方一寸九分其文曰天子羨思慈親明帝爲之改容以太牢告廟

景初元年正月在縣言黃龍見

高貴鄉公甘露元年五月鄴及上谷並言甘露降於是改元

陳留王咸熙元年安彌福祿縣各言嘉禾生

二年二月朐䏰縣獲靈龜以獻四月南深澤縣言甘露

降

晋武帝泰始元年十二月鳳凰六青龍三麒麟各一見于郡國黃龍見雒濱白龍二見太原郡木連理生遼東方域白虎見河南陽翟又見弘農陸渾

二年正月白虎見遼東樂浪又見天水西六月嘉棕一  
帶十實生酒泉八月木連理生河南成臯是年鳳凰六  
青龍十黃龍九麒麟各一見于郡國

三年正月白龍二見于弘農四月張掖太守焦勝上言

氐池縣大柳谷口見有玄石一所白畫成文實大晉之休祥圖之以獻詔以制幣告于太廟藏之天府

五年正月青龍二見滎陽二月白龍二見於趙國五月鳳凰見於趙國七月白兔見北海卽墨長獲以獻

六年四月白龍二見于東莞

七年六月東宮玄圃池芙蓉二花共蒂皇太子以獻

八年正月木連理生東平范陽五月白鳩二集太廟南門議郎董胄獲以獻是月木連理生東平壽張十月木

連理生建寧白鹿見扶風雍州刺史嚴詢獲以獻是月

瀘水胡王彭護獻嘉禾

十年四月甘露降西河離石

咸寧元年正月木連理生汝陰南頓四月白麞見瑯琊  
趙王倫獲以獻是月甘露降張掖白雉見安豐松陽五  
月甘露降清河繹幕九月甘露降太原晉陽十二月白  
雉白雀見梁國睢陽梁王彤獲以獻

二年四月木連理生清河五月甘露降玄菟郡治六月

木連理生燕國十月黃龍二見於漢嘉靈關白兔二見河南陽翟陽翟令華衍獲以獻十一月白龍二見於梁國

三年二月白虎見沛國七月白麞見魏郡是月木連理生始平鄴十一月白雉見渤海饒安相阮溫獲以獻四年六月白兔見天水八月木連理生陳留長垣

五年二月白麟見於平原鬲縣六月甘露降巴郡南充國七月白鳥見竺南縣太守獲以獻九月麒麟見河南

陽城十一月青龍見京兆霸城是年木連理生義陽又  
生樂安臨濟

太康元年正月木連理生涪陵永平三月白鹿見零陵  
泉陵四月木連理生頓丘是月白麟見於頓丘五月白  
鹿見天水西縣太守劉辛獲以獻又白鳥見襄城木連  
理二生濟陰乘氏沛國七月白鹿見零陵零陵令蔣微  
獲以獻是月木連理生馮翊栗邑八月白鹿見永昌南  
平又白龍三見于永昌九月白雉見中山

二年正月木連理生滎陽密六月白雀二見河內太守  
阮侃獲以獻是月白雀二見河南河南尹向雄獲以獻  
七月白鳩見太僕寺八月白兔見彭城十月白兔見趙  
國平鄉趙王倫獲以獻是月木連理十三生南安源道  
三年四月木連理生瑯琊閏四月白龍二見于濟南歷  
城六月嘉瓜異體同蒂生河南雒陽輔國大將軍王濬  
園是月木連理生廣陵海西八月白麇見梁國梁相解  
隆獲以獻

四年正月木連理生馮翊臨晉蜀郡成都七月白虎見  
建平十一月白兔見北地富平十二月嘉禾生扶風雍  
是月白鳩見安定臨涇是月木連理生扶風

五年正月青龍二見於武庫井中三月甘露降東宮七  
月嘉禾生豫章南昌九月白麌見義陽

六年八月白龍見于京兆陰槃

七年三月木連理生河南新安四月甘露降京兆杜陵  
五月白麌見汲郡是月甘露降魏郡鄴六月木連理生

南鄉范陽七月白雀見豫章

八年閏三月嘉禾生東夷校尉國四月木連理生廬陵  
東昌八月白雀見河南雒陽九月嘉禾生東萊掖是月  
木連理生東萊盧鄉十二月白兔見陳留酸棗關內侯  
成公忠獲以獻

九年九月木連理生陳留浚儀十二月青龍黃龍各一  
見于魯國

十年五月白兔見京兆長安是月白雀見宣光北門華

林園令孫邵獲以獻六月嘉麥生扶風郡一莖四穗是歲收三倍十月白虎見犍爲十一月木連理生鄱陽鄴鄉是年白鳩見河南城

太熙元年二月木連理生河南梁

惠帝元康元年四月白鳥見河南城臯縣令劉機獲以獻五月白鳥見梁國睢陽是月木連理三生成都臨邛七月白燕二見酒泉福祿太守索靖以聞是月白鳥見陳留獲以獻是月梁國內史任式上言武平界有柞櫟

二樹合爲一體連九月白鹿見交阯武寧

四年五月甘露降樂陵郡十月白兔見鄱陽

七年三月成臯縣獄有龍升天

愍帝建興元年六月甘露降西平縣八月嘉禾生襄平  
縣一莖十穗

二年三月木連理生朱提是月木連理生益州雙栢六  
月木連理生襄平是月嘉禾生平州治三寶同蒂九月  
麒麟見襄平刺史崔毖以聞十月大將軍劉琨掘地得

玉璽使叅軍郎碩奉之歸于京師

三年四月赤雀見平州府倉七月嘉禾生襄平異體同  
帶八月甘露降新昌縣十一月白雉見襄平

元帝建武元年三月丹陽江寧民虞由墾土得白玉麒麟  
神璽一紐文曰長壽萬年四月尚書僕射刁協獻白雀五  
月白鹿見高山縣六月甘露降壽春閏六月木連理生  
高山縣八月木連理生汝陰十一月木連理生武昌是  
月木連理生汝陰太守以聞

大興元年正月麒麟見豫章七月木連理生武昌

三年正月白鹿二見豫章四月甘露降瑯琊費是月白

鹿見晉陵延陵十一月木連理生零陵

永昌元年九月白鹿見江乘縣

二年正月赤鳥見暨陽

明帝太寧二年正月巴郡言甘露降十一月白鳥見京

都

三年三月白鳥見吳郡海虞獲以獻羣官畢賀

成帝咸和元年十月辛卯宣城春穀縣山岸推獲石鼎  
重二斤受斛餘

四年四月甘露降武昌郡閣前柳樹太守以聞五月白  
鹿見零陵洮陽獲以獻七月長沙郡邏吏黃光於南郡  
道遇白鹿驅之不去直來就光追尋光三百餘步光遠  
抱取遣吏李堅奉獻

六年三月甘露降寧州城內北園桃榛樹刺史以聞是  
年鎮西將軍庾亮獻嘉橘一帶十二實

七年四月甘露降京邑揚州刺史王導以聞

八年四月甘露降廬江襄安縣蔣胃家又降宣城宛陵  
縣之須里五月麒麟騎虞見遼東白虎見新昌縣是月  
木連理生昌黎

九年四月甘露降吳國錢塘縣石鄉康巷之柳樹五月  
白鹿見吳國吳縣白鳶見吳國錢塘內史虞潭以獻八  
月白鹿見長沙臨湘十二月甘露降建平陵又降武平  
陵

咸康元年四月甘露降西堂桃樹

二年三月甘露降鬱林城內四月甘露降西堂又降尚書都堂桃樹又降會稽永興山陰及吳興武昌七月白鹿見豫章望蔡太守桓景獲以獻

三年三月木連理生平州世子府治故園中四月甘露降殿後桃李樹五月甘露降義興縣陽羨里柞樹東西十四步南北十五步

五年豫章南昌民掘地得銅鐘四枚太守褚裒以獻

七年四月甘露降彭城王紘第內衆官畢賀十二月吳國內史王恬上言木連理生吳縣沙里

八年九月廬江春穀縣留珪夜見門內有光取得玉鼎一枚外圍四寸豫州刺史以獻

穆帝永和元年二月春穀民得金券一枚長五寸狀如鐵券明年桓溫平蜀三月廬江太守永上言於春穀城北見水岸邊有紫赤光取得金狀如印遣主簿李邁表送是月甘露降廬江郡內桃李樹太守永以聞八月有

白麞見吳國吳縣西界包山獲以獻

五年二月臨江太守藍田侯述言郡界木連理十一月  
太常劉邵上崇平陵令王昂卽日奉行陵內甘露降于  
玄宮前殿十二月甘露降丹陽湖熟縣西界劉教墓松  
樹縣令王恬以聞衆官畢賀

八年十二月白麞見丹陽永世永世令徐該獲以獻

十二年九月白鹿見鄱陽太守王者之獲以獻十一月

白麞見梁郡梁郡太守劉遂獲以獻

升平三年十二月北中郎將郊曇獻白兔

四年二月鳳凰將九雛見于豐城十一月鳳凰復見豐  
城衆鳥隨之

五年二月南掖門有馬足陷地得銅鐘一枚四月鳳凰  
見於沔北

海西公太和元年四月陽谷獻白兔

簡文帝咸安二年正月甘露降隨郡聶陽縣界桑木沾  
凝十餘里中三月騶虞見豫章

孝武帝康寧二年六月江寧縣建興里僑民李康家有  
樹異本連理

太元三年七月乙酉老人星見南方

十年七月丁巳老人星見

十一年四月瑯琊費有榆木異根連理相去四尺九寸

八月白烏集江州寺庭羣烏翔衛

十二年八月甘露降寧州界內刺史費統以聞

十四年六月寧州刺史費統上言所統晉寧之滇池縣

舊有河水週迴二百餘里有神馬二疋一白一黑出於  
河中去岸百步縣民董聰見之十一月白虎見豫章郡  
十五年三月白兔見淮南壽陽閏月甘露降永平陵

十六年三月白鹿見豫章望蔡獲以獻十一月甘露降  
旬陽縣是月白雀見南海增城縣民吳北屋

十七年二月甘露降南海番禺縣陽

十八年五月白鹿見江乘江乘令田熙之獲以獻十月

臨川東興令惠欣之言縣東南溪旁有白銀樹芳靈樹

李樹並連理

十九年正月華林園延賢堂西北李樹連理二月行輦  
令劉啓期行溫令趙邳並言白虎頻見

二十年九月白鹿見巴陵清水山荊州刺史殷仲堪以  
獻

二十一年正月木連理生南康寧都縣社後五月白鳥  
見吳國獲以獻

安帝隆安二年十月新野言騶虞見

二年武陵臨沅獻安石榴一蒂六實十一月木連理生汝陽太守垣苗以聞

五年十一月襄陽言騶虞見于新野白雀見宜都是月白鹿見長沙白麇見荊州刺史桓玄以聞

元興元年正月木連理生泰山武陽

二年十月甘露降武昌王成基家竹

三年三月甘露降丹徒四月甘露降蘭臺六月白雀見

豫章新塗獲以獻

義熙元年南康雩都高山有金雞青黃色飛集巖間

二年四月無錫壽陽並獻白兔

七年五月白雉見豫章南昌

十二年六月左衛兵陳陽於東府前淮水中得玉璽一

枚

冊府元龜卷二十二